

插图本中国古代史料集成
(第一輯) 九

线装书局

欽定四庫全書

明集禮卷二十七

嘉禮十一

親王納妃

總序

親王納妃之禮自漢以上不著其儀漢高后時始定諸王聘禮南齊武帝以昏禮奢貴敕諸王納妃依禮上棗栗股脩其餘衣物停省而其儀文不備唐皇子納妃則

命親王主昏遣使納采問名納吉納徵請期皆稱某王
亦行冊禮親王親迎妃至宮之明日朝見皇帝皇后宋
皇子納夫人稱國夫人不行冊禮其納采問名納吉納
徵請期皆皇帝臨軒遣使皇子將親迎皇帝臨軒醮戒
夫人至宮之明日朝見皇帝皇后又明日行盥饋禮今
擬國朝親王納妃皇帝御奉天殿遣使納采問名既卜
吉後命使納吉請期又遣官奏告宗廟訖遣使備冊寶
行冊禮親王將親迎皇帝臨軒醮戒王至妃第迎入宮

行同牢禮明日妃朝見皇帝皇后又明日至皇帝皇后
閣內行盥饋之儀今具歷代儀文以著於篇

冠服

唐親王納妃親迎服袞冕妃服花釵揄翟衣纁褙宋皇
子納夫人親迎服九旒冕夫人服揄翟衣花釵首飾今
擬國朝親王納妃服袞冕九章妃服翟衣冠九翬四鳳
冠花釵九樹兩博鬢九鈿詳見冠服篇

車輅

唐制諸王納妃親迎乘象輅妃乘厭翟車宋皇子納夫人皇子乘象輅妃乘厭翟車今擬國朝諸王納妃親迎乘金輅妃乘厭翟車其詳見車輅篇

冊

其制見冊拜篇

冊文

唐冊杞王妃冊文曰維建中二年十一月某日甲子皇帝使某官持節冊命某官竇玆第若干女為杞王妃

曰於戲禮以大昏崇繼嗣本人倫之教詩言淑女配君子繫王化之綱蓋率人成風由內及外得不采配偶以固盤石本閨門以御家邦詳求惟艱厯選茲久時乃之擇得於舊姻柔婉稟乎天和禮樂成於家法明章婦順虔奉姆儀克茂鵲巢之規叶宣麟趾之美其祗膺嘉禮欽率內教淑慎厥心無替於後於戲可不慎哉

禮物

漢制諸王納妃黃金五十斤馬四疋魏諸王娶妃用絹

百九十匹晉太康八年有司奏王侯昏禮玄纁束帛加
璧乘馬齊武帝永明年中以昏禮奢貴敕諸王納妃用
棗栗股脩加以香澤花粉北齊諸王聘禮納采問名納
吉請期親迎皆用羔羊一口鴈一隻酒黍稷米麵各一
斛納徵用玄三匹纁二匹束帛十匹大圭一虎皮二錦
綵六十匹絹二百匹羔羊一口羊四口犢二頭酒黍稷
稻米麵各十斛從車百乘唐諸王納妃納采問名納吉
請期親迎皆用鴈納徵用玄纁束帛大玉乘馬宋皇子

納夫人其納財用函書一通玄纁羅五匹綾十匹押函
馬二疋羊五十口酒五十瓶紅絹百匹花粉十函果十
盤花十罩塗金銀勝二十合綃金生色繡衣十襲真珠
翠毛玉釵朶三副黃金器百兩銀器千兩衣著千匹錢
五百千錦綺羅綾三百匹生帛綾絹六百匹今擬國朝
親王納妃納采問名納吉請期親迎皆用鴈納徵用玄
纁束帛大玉乘馬及其他禮物稱是

納采

唐親王納妃使者朝服乘犢車備儀仗至妃氏第立於大門外之西主昏者立於東階使者曰某公既室某王某王敬由先典使某也請納采主昏者曰某之子蠢愚又弗教某王命之某不敢辭主昏者出門再拜揖使者入陳鴈曰敢納采主昏者北面再拜使者奠鴈主昏者受鴈降自西階以出宋皇子納夫人使者奉制至夫人第曰某王之儷屬于懿淑慎之重之使某行采擇之禮主昏者曰臣某之子顓愚不足以備采擇恭承制命臣

某不敢辭再拜受鴈儀與唐同今擬國朝諸王納妃皇
帝御奉天殿遣使執鴈納采其儀詳見儀注

問名

唐使者納采畢出立於廟門外之西主昏者降立於阼
階下之東使者曰某既受命將加諸卜敢請女為誰氏
主昏者曰某王有命且以備數而擇之某不敢辭主人
再拜揖使者入使者授鴈主人還阼階上西向曰某第
某女某氏出使者降出主昏者禮使者及儗以幣馬如

前儀宋皇子納夫人使者納采訖復入曰某奉制問名
主昏者再拜北面答曰臣某第幾女某氏出其禮使者
與唐同今擬國朝使者納采訖就問名其詳見問名儀
注

納吉

唐親王納妃其日遣使至妃氏大門外贊禮者延入次
謁者引使者出次立於大門外之西東面主昏者立於
阼階下西面儼者進受命出請事使者曰某公有貺命

加諸卜占曰某吉王使某也敢告儻者入告主昏者曰
某之子弗教恐弗堪某王有吉某與在焉某不敢辭儻
者出告其拜迎陞堂受鴈之儀並如納采其禮賓如問
名之禮宋皇子納夫人禮同唐制今擬國朝親王納妃
遣使納吉詳見納吉儀注

納徵

唐親王納徵之禮其日使者至妃氏大門外掌次者延
入次謁者引使者出次立於大門外之西東面主昏者

立於東階下西面儼者進受命出請事使者曰某公有
嘉命貺室某王率由先典使某也以玉帛乘馬請納徵
儼者入告主昏者曰某王順先典貺某重禮某敢不承
命儼者出告使者奉玉帛牽馬者從入陳於庭使者與
主昏者揖入使者曰敢納徵主人於阼階上北面再拜
受束帛乘馬其禮使者皆如問名之儀宋皇子納夫人
其納徵則命使者奉珪以匱及玄纁束帛詣夫人第曰
官占云吉嘉耦既定制使某以儀物告成主昏者曰奉

制賜臣以重禮臣某謹奉典制其受玉帛禮使者與唐
同今擬國朝諸王納妃皇帝臨軒遣使奉玄纁玉帛至
妃第行納徵禮其詳見儀注

請期

唐既納徵使者執鴈詣妃氏第請期使者曰某公有賜
既申受命矣某王使某也請吉日主昏者曰既前受命
矣惟命是聽其受鴈及禮賓並如納吉之儀宋遣使請
期其儀與唐同今擬國朝諸王納妃遣使執鴈至妃第

請期如宋儀詳見儀注

奉冊

唐冊親王妃使者持節公服乘輅備儀仗奉冊及車輅冠服備物至妃氏第主昏者公服立於阼階使副奉冊入閣至於內寢階間南面持節者立於使者之東西面持冊案者又在其南女相者及傅姆引導妃服翟衣立北面使者稱有制妃再拜使者讀冊訖妃又再拜傅姆進受冊以退使者出主昏者拜送於門外女相者引妃